

Awe ta Dia Internacional di Museo

Museo Arqueologico Nacional Aruba (MANA): “Museo como facilitador pa harmonia social”

ORANJESTAD - Diamars dia 18 di Mei ta dia internacional di Museo. E tema cu e “International Council of Museums” (ICOM) a scohe pa e aña aki ta “Museums for Social Harmony”. Den e cuadro aki Museo Arqueologico Nacional Aruba (MANA) ta enfoca riba e rol cu Museo por y ta hunga pa promove y contribui na harmonia social.

Banda di e tareanan basico di e Museo, cual ta documenta, investiga, conserva, comunica y educa, Museo tambe tin e responsabilidad pa promove, contribui y facilita harmonia social den comunidad, mas specifico, pa su publico y vecindario. Especialmente den e temponan aki di desaroyonan liher y hopi biaha no premira, museo por hunga e rol di facilitador pa practica harmonia social comunitario.

Museonan por y ta haci esaki door di mostra perspectivanan diferente den su exposicionan y door di traha exposicionan interdisciplinario y intercultural. Alavez Museonan tin e capacidad pa contribui na dialogonan nacional, pa comparti creacion y vision.

MANA su meta no ta solamente pa ta un museo innovativo y dinamico, pero tambe pa ta un museo cu ta en conexion cu su publico y cu no ta ignora problemanan social. Asina MANA a scohe como prome tema pa su sala di exposicion temporario: “Rancho, Nos Bario, Nos Museo, Tira un Bista”. Cu e exposicion aki MANA kier crea aprecio y atencion pa e bario y kier hunga un rol como catalizador pa futuro desaroyonan. Aunque no por keda sin enfrenta e problemanan actual social y di droga, Museo kier alavez duna un aporte door di ofrece informacion y crea un concientizacion riba e necesidad pa renova y restaura ‘e bario’.

Siguiientemente MANA a desaroya un programa publico den cuadro di e exposicion aki. Door di ofrece actividadnan educativo y alavez recreativo pa gruponan specifico, Museo ta sigui enfoca y ta trece e tema mas cerca di su publico. Entre otro a desaroya un programa educativo pa scolnan secundario cual lo cuminsa fin di e luna aki. MANA ta kere den traha hunto,

den uni forza pa e bienestar di personanan den comunidad (harmonia social). Tur locual MANA a logra pa crea, sea exposicion, programanan educativo of vacacional ta logronan cu MANA solamente por a logra

cu e expertisio, entusiasmo, creatividad, perseverancia y sosten financiero di otronan. Museo tabata e facilitador cu por a trece personanan, instancianan y ideanan hunto cu a resulta den un exposicion y programa

publico di “Rancho”. Museo ta spera di tambe por ta e catalizador pa realisa ideanan pa mehoracion di e bario. MANA ta duna pabien na tur personal y colaboradornan di Museo riba Dia Internacional di Museo.